



KEMENTERIAN KESIHATAN MALAYSIA

KENYATAAN MEDIA KEMENTERIAN KESIHATAN MALAYSIA PENGUATKUASAAN AKTA 852

Kementerian Kesihatan Malaysia (KKM) memandang serius kesan buruk amalan merokok yang berleluasa, termasuk aktiviti pemasaran dan promosi tidak beretika yang disasarkan kepada golongan kanak-kanak dan remaja.

Oleh itu, Akta Kawalan Produk Merokok Demi Kesihatan Awam 2024 [Akta 852] yang telah diwartakan sebelum ini pada 2 Februari 2024 kini akan berkuat kuasa serentak dengan Peraturan-Peraturan serta Perintah di bawahnya bermula 1 Oktober 2024.

Penguatkuasaan Akta ini akan melibatkan beberapa aspek yang akan dikuatkuasakan secara *serta merta* dan juga secara berfasa. Aspek-aspek seperti berikut akan dikuatkuasakan **serta-merta**:

- (i) Peruntukan yang melibatkan penjualan produk merokok yang berbentuk permainan dan menarik perhatian golongan kanak-kanak dan remaja bagi mengekang kebolehdapatan produk tersebut.
- (ii) Peruntukan yang melibatkan pengiklanan, promosi dan tajaan semua jenis produk merokok.

- (iii) Tempat larangan penjualan produk merokok seperti institusi pendidikan, pasar jualan, dalam talian, dan mesin layan diri.

Penguatkuasaan pendidikan pula akan dilaksanakan dahulu bagi tempoh **enam (6) sehingga 12 bulan** daripada tarikh kuatkuasa bagi aspek-aspek berikut:

- (i) Pendaftaran produk merokok, yang akan dikuatkuasakan bermula 1 April 2025.
- (ii) Pembungkusan dan pelabelan, yang akan dikuatkuasakan mengikut produk (*product-by-product*), selewat-lewatnya 1 Oktober 2025.
- (iii) Kawalan jualan termasuk pameran di kaunter jualan, yang akan dikuatkuasakan selewat-lewatnya 1 April 2025.

Penguatkuasaan undang-undang secara berkesan dan mampan memerlukan persefahaman dan kerjasama daripada semua pihak. Untuk tujuan itu, KKM akan turut:

- (i) Menerbitkan bahan pendidikan dan advokasi untuk membantu seluruh pemegang taruh memahami Akta ini dengan lebih jelas.
- (ii) Meneruskan sesi libat urus berkaitan pematuhan Akta ini, terutamanya dengan pemain industri.

Sebarang pertanyaan lanjut berkaitan pelaksanaan penguatkuasaan Akta 852 boleh dibuat di talian 03-8892 4552 atau melalui aplikasi WhatsApp di talian 010-860 8949 pada Isnin hingga Jumaat, jam 8:00 pagi hingga 5:00 petang bermula 30 September 2024.

KEMENTERIAN KESIHATAN MALAYSIA
30 SEPTEMBER 2024